

INSIGNIA DIVINAE REVELATIONIS MONUMENTA

QUEIS CHRISTIANA STAT NIXA RELIGIO

ADVERSUS OMNES AEVI HUIUS PHYSIOTHEOS

PUBLICO LITTERARIO CERTAMINE PROPUGNANDA

PER


THOMAM OJHEA ORD. PRAEDICATORUM

PROVINCIAE HIBERNIAE

IN MINERVITANO D. THOMAE DE URBE COLLEGIO

SACRAE THEOLOGIAE AUDITOREM

FACTO QUIQUE A TERTIO JURE CONTRADICENDI.



ROMAE MDCCCXXIX

TYPIS JOSEPHI ET FRANCISCI SALVIUCI

PALESTRE · ADITVM
 INGENIO · STRENVITATI · ATQVE · DOCTRINE
 PERICLITANDIS
 FELIX · OPPIDO · FAVSTM · QVE · RESERAT
 AVSPICIUM

M A U R U S

TITVLO · S · CALIXTI · S · R · E · PRESBYTER
 CARDINALIS · CAPPELLARIUS
 HANC · COMIS · LYBENS · QVE · IN · SVI · CLIENTELAM
 DISPVATIONEM · ADSCIVIT
 AC · RATVS · IMPENSIYS · SE · VOTIS · CONATIBVS · QVE · VINDICIS
 CORAM · ADFVTVRVM
 CERTAMINIS · IPSE · LITTERARI · ARENAM
 SYA · PRESENTIA · HONESTAVIT
 ID · ERGO · MVNERIS · PRINCIPIS · AMPLISSIMI
 EXIMIA · BENIGNITATE · ADSEQVTVS
 THOMAS · OSHEA · DVBLINIENSIS · E · FAMILIA · PREDICATORVM
 PATRONO · INDVLGENTISSIMO
 OBSEQUIVM · ET · GRATES · PERENNES
 D · O · C ·

EMINENTISSIME PRINCEPS

Quotquot in acie pro virili dimicaturi sunt, illi antea bellicis usque adeo corpus, animumque studiis exercere in castris assuescunt, ut tubæ demum sonitu ciente campum non strenui modo, sed alacres ad arma ruant; quodque jampridem in simulacro pugnae didicerunt, id vero ingruente certamine minime perhorrescant. Haud secus, MAURE Cardinalis amplissime, delectam illam fortissimorum manum, qui ad bella Domini prælianda faustis semper ominibus cælitus evocatur; haud secus, inquara, agere, molirique oportet, ne ardor unquam periculis invadendis, aut fortitudo victoriæ comparandæ deficiat. Sed arma interim militiae nostræ non æra quidem, non arietes, non sanguine imbutos gladios, non quidpiam denique aliud horrentius illis gerimus, quippe Christianæ, si fas ita loqui, Reipublicæ Coriphæus, idemque Apostolicæ Cohortis Princeps, ipso divinitus afflante Numine, Religionis asseclas universos monet, spiritus armaturam omnes induere, ut possint tela nequissimi ignea repellere. En ideo, quo nos robore, quibusque ad congregandum instructi præsidiis haud equidem lævo Marte pugnemus.

Scilicet ipsam Deo statore, ac vindice ævo quolibet ineluctabilem Religionis arcem ingressi, potentis inde fidei loricam elypeosque æternæ veritatis assumimus, immani cuique aggressionum, ictuum, conatuumque apparatus penitus profligando. Atque ut hinc pateat ubinam demum arx illa constet, queis vigeat propugnaculis, quibusque diris ab sævientium hostium impetu aggredi soleat machinantis; schematis illico resecto velamine, proditam dudum mortalibus divinis oraculis sapientiam, eique mox prophætorum rabie æstuante, objectam nefariam errorum colluviem digito velut inuimus. Quem enim unquam præterisse arbitrandum, quod jure olim, ac more suo præclare Doctorum celeberrimus Augustinus de illi videlicet sapientiæ predicabat, fore utique eam, qua fides saluberrima gignitur, enutritur, defenditur, ac roboratur? Sed neminem rursus latere potest, quo astu, contentione, ac molimine eandem appetere, inque omnia vel augustissima illius mysteria acerrime debachari hæresum monstra conentur. Quid igitur rei tantæ ab perduellium incursibus enixe tuendæ, quid facto denique erit opus dexteris quibusque ob id certantibus propugnatoribus? Hoc sane primum; mente, animoque, totisque viribus enitendum, quo summa illico scientiæ illius oppido admirandæ fastigia teneant, munimenta corroborent, atque sublimi veluti e Turris vertice telorum jactus vel minacissimos quosque retundant.

Bene itaque, bene habet, PRINCEPS Eminentissime, quod hoc Superis aspirantibus votum, perpetua hæc item illorum omnium exercitatio, qui a fide stantes arduos ut vis labores, ingentes animorum conatus, maximos demum, atque terribissimos pro ea conflictus nec aggredi renuant, nec pati quo-

quomodo reformidant. Testis et veterum, et recentiorum, quos ipso ab munere Apologistas nuncupavere, longe invictissimus germanæ fidei tutandæ ardor innumeris propemodum, totidemque præclaris editis voluminibus; testis haud secus eximius perillustrium Academiarum ea de re contentio iis omnibus sive lucrandis, sive explodendis, qui ab Ecclesiæ matris gremio facta nequissima secessione desciverunt. Atque, si vero interdum litare absque arrogantiae nota licet, addam id quoque lubenter; hujus quam memini curæ, fervoris, strenuitatisque testem hanc ipsam Theologicæ disceptationis arenam jure optimo prædicari.

At porro num Is Ego futurus, qui hoc laudis, per quam insigne testimonium mox subeunda dimicatione confirmem? Vereor maxime, et rei protinus deterritus magnitudine, et ipsa ingenii exiguitate commotus. Cumque interea duobus hisce utrinque obversis absistere æquius periculo, quam auspicari negotium debuissem; alacri nihilominus plenum opus arripere; dumis, salebrisque refertum iter invadere penitus non dubitavi. Et quid revera ni facerem, quod æstuans corde Religionis amor, quod ipsa suscepti a me instituti ratio exposcere, imo etiam efflagitare suo quodam jure videbatur? Sed illud quoque oneri, metuique levando peropportuno accessit, Polemicæ nimirum in hac palæstra disciplinæ Tyronem ingenium periclitantem, per quam jucundo, eoque perhonorifico tueri Patrocinio.

Ita plane, Eminentissime PRINCEPS, cum Te Auspicem huic meæ concertationi video; Cum in eximiam comitatem, benignitatemque tuam oculos, animumque converto; recreor protinus, in spem erigor, et mira prorsus, atque incredibili alacritate perfundor. Nec vero facilem illam propensionem erga

me Tuam mirari quempiam existimabo; dum Te præstantibus, longeque nobilissimis in Religionem, inque universam orthodoxæ Ecclesiæ doctrinam promeritis abunde cumulatam, sacro in Urbe cætui ab Christiano nomine propagando præesse conspiciat. Intelliget namque Te omnibus perarui muneris partibus feliciter adeo fungi, nullis ut parcas inventis, laboribus, sollicitudinibus, quo fidei Christianæ decus toto orbe refulgeat, vigeat, atque efflorescat. Hinc prona illa, atque humanissima Tua voluntas in omnes ad infidelium regiones missos Evangelicæ veritatis Præcones. Hinc rursus præclara insignioris benevolentiae officia in cunctos lectissimæ spei Adolescentes, qui cum ob rem tuo sub regimine, ac moderamine instituuntur. Et hinc denique singulare illud mea numquam memoria excessurum, quo me hodie prosequeris optatissimæ clientelæ beneficium, quod non tam meum, quam nostræ hujusce Germanicæ Familiæ, meæque Gentis, atque ipsius fere Religionis edixerim. Nam huic potissimum me, meaque imposterum peculiari quadam ratione, ac studio devovere constitui, natale solum quantocyus revisurus. Oro itaque, obtestorque honestissimo sane quorumque proposito rite inchoando jam nunc dexter annuere, PRINCEPS Eminentissime, ne dedigneris. Spondet id maxime amplissimæ in Te Ordinis dignitas. Effert mirifica, fastusque nescia morum suavitas, atque ipsa demum omnigenæ eruditionis, ac sapientiæ amplitudo, efficientius pollicetur.

His Ego vehementer innixus, ob idque meæ lubenter felicitati gratulatus; unum hic tandem a tua humanitate deprecor, sinas, ut obsequens in perenne devotionis argumentum fimbriam ejus deosculer.

Quæ fluit ante tuos Purpura sacra pedes.

T H E S E S.

1.

Mortalium quisque pulcherrimam, longeque ornatissimam Orbis universi molem intuitus; Numen extemplo rerum quarumlibet opificem cogitat; Supremum ejusdem cuncta moderantis Imperium cernit; arctumque demum cum ipso entium conditorum nexum, atque ordinem contemplatur.

2.

Vi porro nexus, ordinisque hujus effectuum omnium ad principem sui causam, efficitur protinus natura ipsa excitante, ut quot enitent in hac tam mirifica rerum compage sensu, ac ratione prædita entia, maximo eidem a quo pendent Conditori vicem afferant agnitionis, laudis, obsequii, quod est cultum grati animi Deo rependere.

3.

Mentis revera, et cordis ne tantam Numinis Majestatem dedeceat, cultus ille ab hominibus affratur necesse est; at non id satis, cum animo simul, et corpore homines coalescant, debeantque propterea, duplici accepto munere, utroque pariter Auctori summo referre grates, cultus nimirum interioris, exteriorisque.

4.

Interea tamen hominis indoles laethali praesertim primigeniae noxae vulnere sauciata, cultus illius formæ, honestatique determinandæ impar est prorsus; egetque proinde ea de re Numinis ejusdem dictamine, ac magisterio.

5.

Nulla jam vero absurditas, nullas neque obex divinæ huic Coelestium consiliorum declarationi officere ullatenus poterat. Quin immo et Dei loquentis clementissima bonitate, et hominis illius gestantis imaginem nobilissima conditione atteuta, id sane muneris apprimè decebat; Hinc ergo divinæ revelationis possibilitas.

6.

Ganniant licet, blaterentque vesano clamore Deistae, quam nuper congruam humano Genæi, ac suapte natura possibilem revelationem asseruimus, eam insuper universis Adæ posteris omnino necessariam Numini rite colendo demonstramus.

7.

Sunt autem necessitatis hujus causæ multiplices, gravissimæque; optima in primis, atque undique accurata in singulis præceptionibus naturalis ipsius legis cognitio.

8.

Sed et quarumdam celsioris ordinis veritatum perceptio humanæ cujuslibet intelligentiæ vires oppido supereminens, haud equidem aliter, quam divino radiante lumine innotescere mortali-
bus poterat.

9.

Fulsit itaque largiente Deo mortalibus iisdem auspicatissimum, planeque admirabile, ut inquit Apostolus, lumen illud; Quamobrem nemini cui patefiat, Revelationis existentiam inficiari absque dementiæ, atque adeo sceleris nota licet.

10.

Jam de eodem injuriæ videlicet, audaciæque facinore postulamus, quotquot adversos germanæ revelationi se præbent; quod pleraque illa humanæ rationi impervia, Mysteria nimirum de fide proponat; ea quippe nil absonum produnt; suntque præterea Deo revelante dignissima.

11.

Quo vero eadem sensibus hominum, ingenioque nequidquam apparentia, protinus aliunde consentanea, ac credibilia exhiberentur; notis quibusdam, seu characteribus apprimè illustribus donata fuere, quæ integra revelatio ab spurciis, iisque mendacibus prophanorum commentis toto coelo discriminatur.

12.

Eas inter præclaras, nec ulli unquam ancipites divini verbi notas, doctrinæ primum undique explorata perfectio, dignitas, sanctitasque refulget, in alium neminem, quam in Deum ipsum auctorem referenda.

13.

Hanc quoque longe nobilissimam altera excipit revera miri-

fica, splendor videlicet prodigiorum testandæ divinitus revelationis *authentice*, ac veritati.

14.

Vapulant ideo, nec immerito, ab orthodoxis, cordatisque sapientibus cum recentiorum Fatalistarum Vexillifer Spinoza, tum alter Sycophantæ illius fere gregalis Wolstonus, qui atrox, idemque nequissimum miraculis quibusque indixere bellum.

15.

Aequum id potius, atque adeo necesse rite cogitanti, prodigia veri nominis ab commentitiis, fallacibusque discernere: illa vereri, isthaec explodere; qua nos mente, ac jure pseudo quælibet Gentilium miracula spernimus, exsibilamus.

16.

Non secus interim, ac illi supra naturam omnem eventus veræ, atque divinæ revelationi luculentissimum testimonium afferunt vaticiniorum oracula, totidem nimirum falli nescia Dei loquentis indicia.

17.

Fallit propterea, falliturque hac de re vehementer Grotius, id opinari laud veritus, Prophetarum eloquiis nullam inesse vim arguementi; sed ea solum induci ad fidei Dogma jam creditum illustrandum, confirmandumque.

18.

Notarum porro, de quibus hactenus, explorata consensio

evincit penitus, divinam quam colimus revelationem per Moysen primum publicis tabulis, ac monumentis innotuisse.

19.

Illum itaque omnipotentis imperio primum Hebrææ Gentis Legiferum, Doctoremque constitutum agnoscimus; divinamque revelationem in Pentateucho existere tum ex miraculis, tum ex Prophetiis in eo contentis evincimus.

20.

Ab fide hinc, germanaque historię veritate abludunt, quotquot audacter nimium effutiere, Pentateuchum haudquaquam Moyssis genuinum; sed spurium alterius impostoris fœtum, longo post Moysen tempore cusum existimandum.

21.

Cum iis demum, qui sacris Moysi libris suppositionis, ant fallacię notam inurere conati sunt; recentiorem quemdam Philologum et Criticum refutamus, qui edita Lipsiæ elapso anno 1828 nova adumbratione in librum Geneseos, illum autumat non tam Moysi, quam tribus, iisque diversis Auctoribus tribuendum.

22.

Jam licet summam divinorum cloquiorum, legisque præsertim Pentateuchus exhibeat: haud ille tamen unus, atque integer univærsę revelationis codex habendus, quin ea pariter et in aliis prisci fœderis libris evidentissime constat.

23.

Særa præterea quæ novi Testamenti audiunt volumina, et ipsa undique Numinis oracula pandere optimis, planeque inconcussis momentis evincimus.

24.

Atque illud etiam singulos, omnesque eum veteris, tum novi Testamenti libros, ipso auctore Deo Scriptores, ut vocant agiographos inspirante fuisse editos.

25.

Merito exinde in censum, seu Canonem divinarum scripturarum factus illos ab Tridentina Synodo relatos suscipimus, ac reveremur; Canonisque ejusdem penitus irrefragabilem authenticam, ut orthodoxæ fidei sanctionem propugnamus.

26.

At hujus revera fidei jaeturam facere dicendi sunt periti illi, prophætanique novatores, qui ut plerosque alterutrius fœderis libros ab divinorum Canone expungerent, quartam Tridentinæ Synodi sessionem, ceu illegitimam, minimeque OEcumæniam repudiarent.

27.

Ad genus autem, præsensque quod attinet doctrinæ meritum sacris illis codicibus reseratum; nemini profecto licet ambigere, quin tales prorsus utriusque fœderis libri ad nos usque pervenerint, cujusmodi ab initio Numine afflante sunt editi.

28.

Nec quidquam reapse pretii, auctoritatisve nativis exemplaribus ademptum plurimis versionibus arbitramur; quin potius fidei Religionisque incremento, illorum ope consultum, quas dudum Ecclesia probavit, ceu totidem unius, ejusdemque divini luminis reflexi radii.

29.

Latinis omnibus sacrorum Bibliorum editionibus, Vulgata, seu Itala vetus, ut Augustino visum, sive Hieronymi, ut aliis placuit, nedum jure, auctoritateque præcellit; sed insuper tabulis, ac fontibus divinæ revelationis primigeniis in iis, quæ fidei, et morum sunt apprime respondet.

30.

Perperam hinc, atque adeo mendacissime e Lutheranorum castris Kemnitius, e Zuingliana secta Calvinus Vulgatæ ipsius editionis errata, mendaque comminiscuntur; quæ nullibi sane in Dogmatibus, præceptisque ad Religionem atinentibus deprehendere licet.

31.

Stat itaque, æternumque stabit auspice Deo præclaris hisce monumentis fulta revelatio; nec iis tamen unis, quod Novatores obtendunt, undique illam constare arbitramur: cum alio insuper oralis videlicet Traditionis medio æqua evidentie, ac veritatis luce manaverit.

32.

Etenim quidquid absurdi climinandæ, si potis erant, divinæ huic Traditioni Heterodoxi homines effinxerint, eis nihilo-

minus, vel ipsa scripturarum oracula jugulum petunt, quæ traditum Dei Verbum, illiusque originem, potestatem, atque excellentiam disertissime promunt.

33.

Atque his quidem traditionibus divini generis ne fraudis unquam, errorisque fūco ab prophanis temerarentur; tesserae quædam sunt inditæ perennitatis, ac certitudinis, de quibus optime Liricensis: *quod ubique, quod semper, atque ab omnibus creditum ec.*

34.

Ad quas illico notas, characteresque longe tutissimos vanas plebrasque Novatorum traditiones expendentes; Lydio veluti ex lapide earum quarumque ut ut vaferrimam fallaciam detegimus, execramur.

35.

Cum ergo duplicem, si fas ita loqui, divinæ revelationis Thesaurum, ex antedictis vindicare animus fuerit; Scripturam videlicet, ac Traditionem: par hinc præterea, et illud sane gravissimum constituere, neutram regularum illarum se ipsa adeo perspicuam fore, ut nulla prorsus indigeat interpretatione.

36.

Sed hanc interim quoquo modo aggredi, et marte, ut inquit, proprio expedire nemini sane cordato licet, planeque sapientissimo Christianæ Reipublicæ civi ullatenus tribuendum.

37.

Absonum hinc, idemque orthodoxæ fidei penitus exitiale Com-

mentum quo *via examinis* promendo e Scripturarum latice divi-
norum oraculorum sensui, ab Novatoribus obtruditur; jure opti-
mo refellimus, aspernamur.

38.

Cuique enim præcipitem illam, fallacemque viam ineunti in
Fidei Controversiis, nedum pronum, sed insuper necessarium
est Systematis ipsius dictamine in pessimum *Tollerantismum*, seu
Indifferentismum ruere.

39.

Neque id monstri teterrimam revelatæ Religioni cladem mini-
tantis, aliter unquam confodere, ac profligare contingit; nisi
objecta protinus indeclinabili auctoritate *Docentis Ecclesiae*, quæ
sive in OEcumenicis Synodis congregata, sive Orbe toto di-
spersa unanimi Pastorum suffragio infallibiliter de Fide pronunciat.

40.

Denique quod eadem *Rectrix*, ac *Docens Ecclesia* utroque
illo modo præstare valet; idipsum potest falli nescio Doctrinæ
Apostolicæ Magisterio Romana Sedes, illiusque Pontifex uni-
versi Dominici Gregis Pastor divinitus institutus.

*Publice Disputabuntur ad S. Mariæ supra Minervam Die
Augusti hora 21 cum dimidio. Preerit concertationi F. An-
gelus Vincentius Modena. In Collegio D. Thomæ Aquinatis de
Urbe Sacrae Theologiae Professor, et Evangelicæ veritatis ad
Hebræos Concionator.*

NIHIL OBSTAT.

FR. PLACIDUS TADINI ORD. CARMEL. CENSOR THEOL.

IMPRIMATUR.

FR. JOS. M. VELZI S. P. A. MAGISTER.

IMPRIMATUR.

J. DELLA PORTA PATR. CONSTANTINOP. VICESGERENS.

VA1
1546163